



Uunga  
Anthon Frederiksen  
Inatsisartunut ilaasortaq  
Partii Naleraq

## **Assigiimmik akissarsiaqartitsinnermut tunngatillugu § 37 naapertorlugu apeqqutip nr. 2018-016-ip akineqarnera**

Asasara Anthon Frederiksen

Assigiimmik akissarsiaqartitsinnermut tunngatillugu apeqqutigisannut qujanaq.

29-01-2018  
Suliap nr.: 2018 - 2081  
Akt. id. 7109407  
Postboks 260  
3900 Nuuk  
Oqarasuaat (+299) 34 50 00  
Naqitanik nassitsigasuaat +299  
34 66 66  
Mail: iniian@nanoq.gl  
www.naalakkersuisut.gl

### **1. Angutini arnanilu assigiimmik ilinniagalinni akissarsianik suli assigiinngisitsisoqarnera Naalakkersuisunit ilisimaneqarpa?**

Isertitanut naatsorsuutit Naatsorsueqqissaartarfimmeersut akissarsianut sanillunneqarsinnaanngillat. Inuit isertitaasa naatsorsoqqissaarnerat nammineerluni nalunaarsuisimanernit paasissutissanik aallaaveqarput. Taamaammat naatsorsueqqissaarnerni inuit isertitaat naatsorsorneqartut akileraarutigut soqutiginaateqarsinnaasunik akileraartarnermullu oqartussaasunit ilisimaneqartunik isertitanik imaqarput. Imaappoq, suliffeqarnermit isertitat saniatigut ilaatigut suliffeqarfimmit nammineq pigisamit sinneqartoorutit, ernianit isertitat, pisortanit ikiorsiissutit akileraarutaasussat, ilinniagaqarnerisutit, siusinaartumik pensionisiat utoqqalinersiallu il.il. ilaapput. Ilanngullugulu taaneqassaaq suliffeqarfiit sulisumik akissarsiaat akileraartarnermut aqutsisoqarfimmut nalunaarutigisarmatigit, inuilli nalunaaquttap akunnerini qassini sulisimanersut nalunaarutigineq ajorlugit. Taamaammat naatsorsueqqissaarnerit taakku akissarsianik assigiinngisitsisoqarneranik inerniliinissamut atorneqarsinnaanngillat, assersuutigalugu inuit ataatsimoortut assigiinngisut akornanni akissarsiat assigiinnginnerannut takussutissatut atorsinnaanatik.

Arnat angutillu assigiimmik suliallit akissarsiaasa assigiinngissinnaanerit tunngatillugu assigiimmik akissarsiaqartitsineq pillugu Kalaallit Nunaanni misissuisoqarsimaneranik takussutissaqanngilaq.

Taamaammat arnanut angutinullu, assigiimmik ilinniagaqarsimasunut, akissarsiatigut assigiinngisitsisoqarnera Naalakkersuisut ilisimangilaat. Soorunami Naalakkersuisut isumaqarput inunnut assigiimmik suliqartunut assigiimillu sulisitsisoqartumut akissarsianut atugassarititaasut assigiittariaqartut.

Siuliani apeqqutigineqartunut Naatsorsueqqissaartarfimmit paasissutissanik piniartoqarpoq.

**2. Arnaaneq angutaassuserluunniit apeqqutaatinnagit akissarsiaqartitsineq tamakkiisumik atortinneqassappat suut inatsisit allanngortinneqartariaqarpat, imaluunniit nutaamik inatsisiliornissaq pisariaqassava?**

§ 37 naapertorlugu siusinnerusukkut apeqqutigineqartoq (2016-221) innersuussutigalugu, suaassuseq tunngavigalugu assigiinngisitsineq Angutit arnallu naligiissitaanissaat pillugu Inatsisartut inatsisaat nr. 3, 29. november 2013-imeersoq naapertorlugu inerteqqaavoq. Taamaalilluni inatsimmi siuliani taaneqartumi § 14, imm. 1-imi imatut allassimasoqarpoq:

*"Sulisitsisoq kinaluunniit sulianut assigiinnut sulianullu assinganik naleqartutut isigineqartunut arnanut angutinullu assigiinnik aningaasarsiaqartitsissaaq, aningaasarsiatigut atugassarititaasut ilanngullugit."*

Taamaammat Kalaallit Nunaanni sutigut tamatigut assigiinngisitsinissap pitsaaliornissaanut pisortatigoortumik malittarisassanik ullumikkut peqartoqartoq Naalakkersuisut nalilerpaat.

**3. Sumi inunngorsimaneq tunngavigalugu akissarsiaqartitsisarneq 1991-imi atorunnaarsinneqartussaagaluaq, qaqugu tamakkiisumik atorunnaarsivinneqarnissaa Naalakkersuisunit qanoq iliorfigineqarniarpa?**

Politiit, inissiisarfinni paarsisut, allaffinni sulisut allallu sulisorineqartut assigiimmik sulisitsisoqarlutik assigiinngitsunik akissarsiaqartinneqarnissaa Naalakkersuisut akuersaanngilaat. 2017-imi maajjugaa ataatigut atsiortunga Justitsminister Søren Pape Poulsenip ataatsimeeqatiginerani ajornartorsiut pillugu oqaloqatigaara, Naalakkersuisullu naammagisimaarlugu paasivaat Justitsministeeriaqarfik kalaallinut nunaqavissunut aamma danskinut tikisitanut tunngatillugu inatsisinik atuutsitsinermut suliassaqarfimmi sulisorineqartut assigiinngitsut akissarsiatigut atorfeqarnermikkullu atugarisaat allaaseriniarlugit sulilluni aallartissimammat. Naalakkersuisut inatsisinik atuutsitsinermut suliassaqarfimmi periusissatut suliniutissanullu pilersaarutaanni 2017-imeersumi inassutigineqarpoq sulisitsisumi ataatsimi assigiimmik akissarsiatigut atugassaqartitsisoqarnissaa qulakkeerneqassasoq. Tamanna pillugu Justitsministeeriaqarfimmit oqaloqatigiinnerit ingerlajuarput.

Med venlig hilsen  
Inussiarnersumik inuulluaqqusillunga

Sara Olsvig  
Isumaginninnermut, Ilaqutariinnermut, Naligiissitaanermut Inatsisinillu Atuutsitsinermut  
Naalakkersuisoq